

Na osnovu člana 30. tačka h) Poslovnika o radu Općinskog vijeća Tešanj („Službeni glasnik Općine Tešanj“, broj: 03/18), te u skladu sa članom 2. Odluke o izmjenama i dopunama Kodeksa ponašanja izabranih vijećnika u Općinskom vijeću Tešanj („Službeni glasnik Općine Tešanj“, broj: 07/21) usvojene na osnovu člana 14. Statuta Općine Tešanj („Službeni glasnik Općine Tešanj“, broj: 11/07) i člana 79. Poslovnika o radu Općinskog vijeća Tešanj („Službeni glasnik Općine Tešanj“, broj: 03/18), Statutarno-pravna komisija Općinskog vijeća Tešanj na svojoj 13. sjednici održanoj dana 29.03.2024. godine, utvrdila je:

K O D E K S

ponašanja izabranih zvaničnika - vijećnika u Općinskom vijeću Tešanj (Službeni prečišćeni tekst)

I – OPĆE ODREDBE

Član 1.

- (1) Ovim Kodeksom utvrđuju se i promovišu etički principi i standardi ponašanja i rada izabranih zvaničnika – vijećnika (u daljem tekstu: vijećnici), u cilju kvalitetnog ostvarivanja mandata u interesu svih građana općine.
- (2) Vijećnici svoja prava, dužnosti i odgovornosti ostvaruju u skladu sa Zakonom, Statutom, Poslovníkom o radu Vijeća i ovim Kodeksom.

Član 2.

Vijećnici Općinskog vijeća Tešanj, kao neposredno izabrani predstavnici građana općine Tešanj, uzajamno se obavezuju na poštivanje ovog Kodeksa, a sve u cilju opravdanja i jačanja javnog povjerenja, ličnog i političkog integriteta i autoriteta koji pripada Općinskom vijeću Tešanj i njima kao njenom sastavnom dijelu.

II – PODRUČJE PRIMJENE

Član 3.

- (1) Ovaj Kodeks se odnosi na vijećnike Općinskog vijeća Tešanj (u daljem tekstu: Vijeće) kao izabrane vijećnike na neposrednim izborima.
- (2) Principi ponašanja ustanovljeni ovim Kodeksom primjenjivat će se tokom cijelog izbornog mandata.
- (3) Vijećnici u Vijeću će uvijek težiti odlučivanju u skladu sa utvrđenim kriterijima, vodit će ravnomjernu brigu za sve mjesne sredine i građane, bez obzira na sredinu iz koje dolaze.

III – PRINCIPI PONAŠANJA

1. Definisane principa i standarda rada u obavljanju funkcije

Član 4.

Vijećnici preuzimaju obavezu da će u cilju obavljanja svojih dužnosti u Vijeću i prema javnosti u cjelini, pridržavati se slijedećih propisa i standarda:

- 1. prioritet zakona i općeg interesa,**
- 2. integritet,**
- 3. nesebičnost,**
- 4. zabrana mita i korupcije,**
- 5. otvorenost i odnosi sa medijima,**
- 6. odgovornost,**
- 7. izbjegavanje sukoba interesa,**

8. **pravilno upravljanje resursima,**
9. **profesionalno usavršavanje,**
10. **uzajamno poštovanje i uvažavanje.**

1.1. Prioritet zakona i općeg interesa

Član 5.

- (1) U svom cjelokupnom djelovanju vijećnici će uvijek poštivati prioritet zakona i općeg interesa i svoje aktivnosti će usmjeriti i djelovati u ostvarivanju javnog interesa.
- (2) Vijećnici će u svom djelovanju uvijek imati na umu da su izabrani predstavnici svih građana u općini Tešanj, a ne nekog njihovog dijela.
- (3) U svom djelovanju uvijek će svoje odluke i prijedloge podešavati isključivo u okviru propisa i po procedurama koje su predviđene propisima.
- (4) Nijednu svoju odluku neće donijeti niti će glasati, niti prećutati da javno iznesu svoj stav, ukoliko im je poznato da određeni akt koji treba da se donese nije u skladu sa propisima ili da nije poštovana procedura njegovog donošenja.
- (5) Vijećnici u Vijeću imaju zajednički interes raditi na najboljim rješenjima za sve građane općine Tešanj, u okviru nadležnosti, ovlaštenja i odgovornosti, koje općine, kao jedinica lokalne samouprave imaju prema Zakonu.

1.2. Integritet

Član 6.

U svom djelovanju vijećnici će, prema svojim znanjima i sposobnostima, uvijek samostalno donositi svoje odluke za koje su odgovorni, uvijek imajući u vidu najbolji interes svih građana i neće dozvoliti spoljni uticaj na ispoljavanje njihove volje prilikom raspravljanja i odlučivanja po pojedinim pitanjima iz nadležnosti Vijeća ili radnog tijela Vijeća.

1.3. Nesebičnost

Član 7.

Vijećnici će postupati u skladu sa općim interesima koji isključuju rad za finansijsku dobit ili bilo koju drugu direktnu ili indirektnu korist za sebe ili lica iz svog privatnog okruženja, izuzev naknada i nagrada utvrđenih aktima Vijeća ili drugog nadležnog organa.

1.4. Zabrana mita i korupcije

Član 8.

Vijećnici ni u kom slučaju neće u obavljanju svojih funkcija primati ili davati neku naknadu, obećavati nagradu ili kakvu drugu korist.

1.5. Otvorenost i odnosi sa medijima

Član 8a.

- (1) Vijećnici će u svom djelovanju i u vezi sa odlukama koje donose uvijek biti otvoreni i nijednom svojom aktivnošću neće izbjegavati da jasno i javno saopšte svoje stavove i razloge za sopstvene odluke i ponašanja.
- (2) Vijećnici su spremni iznositi svoja različita početna stajališta, kao izraz kolegijalnog neslaganja, utemeljena na međusobnom uvažavanju s krajnjim ciljem približavanja različitih stajališta na temelju iznesenih činjenica.
- (3) Prema zahtjevima medija će pošteno i u potpunosti pružati informacije vezane za obavljanje njihovih dužnosti i neće podržavati nijednu povjerljivu informaciju ili informaciju koja se tiče privatnog života vijećnika ili trećih lica.

1.6. Odgovornost

Član 8b.

- (1) Vijećnici će u svom radu raditi na primjeni i poštivanju propisanih procedura, djelovati u skladu sa principima dobre uprave, omogućiti efikasan, efektivan i ekonomičan rad Vijeća, kao i nepristrasnost u odlučivanju, koja isključuje bilo kakav vid diskriminacije, političkog pripadanja i nepotizma, kao i javnost svog djelovanja.
- (2) Takođe su vijećnici odgovorni za kreiranje i ostvarivanje politike javnih usluga, djeluju u skladu sa principima demokratije, časti i poštenja, a sama odgovornost vijećnika je individualna.

1.6a. Uznemiravanje na osnovu spola i seksualno uznemiravanje

Član 8c.

- (1) Uznemiravanje je svako neželjeno ponašanje na osnovu spola kojim se želi povrijediti dostojanstvo osobe ili grupe osoba i stvoriti zastrašujuće, neprijateljsko, degradirajuće, ponižavajuće ili uvredljivo okruženje ili kojim se postiže takav učinak.
- (2) Seksualno uznemiravanje je svaki neželjeni oblik verbalnog, neverbalnog ili fizičkog ponašanja spolne prirode kojim se želi povrijediti dostojanstvo osobe ili grupe osoba, ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.
- (3) Neželjeni oblici verbalnog ponašanja koji predstavljaju uznemiravanje na osnovu spola i seksualno uznemiravanje uključuju između ostalog:
 - a) upućivanje verbalnih i fizičkih prijedloga seksualne naravi drugoj osobi;
 - b) zahtijevanje neželjenog fizičkog kontakta;
 - c) iznošenje šala ili aluzija koje su spolne prirode, uključujući opaske u vezi spola i seksualne orijentacije;
 - d) izrugivanje i ismijavanje na spolnoj osnovi;
 - e) pisanje seksualno eksplicitnih ili sugestivnih poruka ili pisama;
 - f) neželjeni pozivi na sastanke, flertovanje te zahtijevanje spolnog odnosa ili seksualnih usluga;
 - g) širenje glasina seksualne naravi;
 - h) prijetnje upućene osobi koja odbija udovoljiti seksualnim ponudama.
- (4) Neželjeni oblici neverbalnog ponašanja koji predstavljaju uznemiravanje na osnovu spola i seksualno uznemiravanje uključuju između ostalog:
 - a) gestikulacije, znakovi i insinuacije koje upućuju na imitaciju spolnog odnosa;
 - b) izlaganje druge osobe bilo kojem materijalu eksplicitnog, uvredljivog ili uznemirujućeg sadržaja.
- (5) Neželjeni oblici fizičkog ponašanja koji predstavljaju uznemiravanje na osnovu spola i seksualno uznemiravanje uključuju između ostalog:
 - a) neželjeni fizički kontakti te dodiri seksualne naravi;
 - b) neželjena invazija ličnog prostora;
 - c) fizički nasrtaji i napadi.

1.7. Izbjegavanje sukoba interesa

Član 9.

- (1) Vijećnici se trebaju ponašati savjesno i odgovorno, da ne ugrožavaju povjerenje i pouzdanje građana, te da poštuju zakone i druge propise kojima se određuju prava, obaveze i odgovornosti u obnašanju javnih dužnosti.

- (2) Vijećnici će se u svakom slučaju pridržavati odredbi Zakona o sukobu interesa u institucijama vlasti Bosne i Hercegovine i drugih zakona koji utvrđuju nespojivost funkcije vijećnika sa funkcijom ili položajem u lokalnoj upravi, državnom organu ili preduzećima. U svim slučajevima nastupanja sukoba interesa ili nespojivosti funkcija, vijećnik će u najkraćem roku prijaviti takav slučaj i odstupiti sa pozicije.
- (3) Vijećnici će se u svakom slučaju tokom rasprave prijaviti slučaj sukoba interesa, ako se razmatra određeni akt koji treba da bude usvojen i po kom bi on, ili njegovi srodnici i prijatelji ili pravni subjekt u kome ima finansijski ili drugi interes, trebalo da ostvari kakvu korist ili privilegiju, i prilikom odlučivanja će se izuzeti od izjašnjavanja.
- (4) Vijećnici će se uredno pridržavati zahtjeva za prijavu podataka ili davanje informacija o funkcijama koje zauzima, zanimanju i promjenama u njegovoj imovini.

1.8. Upravljanje resursima

Član 10.

Vijećnici će sa najvećom pažnjom i odgovornosti usmjeriti svoje ponašanje i odluke koje se odnose na finansijska sredstva i upravljanje imovinom Općine, isključivo u skladu sa pozitivnim zakonskim propisima. Svojim ponašanjem neće dati povoda, niti aktivno ili pasivno učestvovati u pripremanju ili podsticati donošenje nepravilnih odluka, koje bi mogle donijeti lične koristi ili ostvarenja nečijeg privatnog interesa sa kojima su povezani finansijskim ili nekim drugim interesom.

1.9. Profesionalno usavršavanje

Član 11.

U cilju što uspješnijeg obavljanja povjerenih dužnosti, vijećnici će kako samostalnim aktivnostima tako i obaveznim prisustvom seminarima, savjetovanjima i drugim oblicima edukacije, obogaćivati i usavršavati svoja znanja i sposobnosti u zaštiti i zastupanju javnog interesa.

1.10. Uzajamno poštovanje i uvažavanje

Član 12.

- (1) Od presudne važnosti je spremnost svih vijećnika da se otvoreno razgovara i iskreno u međusobnim odnosima, nenapadački i neodbranaški, bez podilaženja izvršnoj vlasti, uz samopoštovanje i dostojanstvo, ali i poštivanje i dostojanstvo drugih.
- (2) U međusobnoj komunikaciji i uopće sa javnošću, vijećnici će u svakom slučaju istupati sa uvažavanjem i poštovanjem, njegovati kulturu dijaloga, izbjegavajući korištenje izraza koji mogu vrijeđati ili omalovažavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.
- (3) Poštujući obaveze vijećnika da su dužni prisustvovati sjednicama Vijeća i tijela čiji su članovi, a uvažavajući jedni druge, neće napuštati sjednicu prije završetka, a ni tokom trajanja, a da prije toga ne saopće javno ili predsjedavajućem, razlog povremenog ili potpunog napuštanja sjednice. Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, predsjedavajućem će saopćiti te razloge, a on će Vijeće ili radno tijelo Vijeća obavijestiti o razlogu izostanka pozvanog vijećnika.
- (4) Takođe, vijećnici će nastojati da prisustvuju javnim manifestacijama ili javnim skupovima na koje su uredno i blagovremeno pozvani u svojstvu vijećnika.

IV – SVEČANA IZJAVA

Član 13.

Vijećnici prilikom preuzimanja dužnosti daju svečanu izjavu kako je to predviđeno Poslovníkom i potpisuće posebnu izjavu o prihvatanju i obavezi poštivanja i primjene Kodeksa kako je određeno članovima 8. i 9. Poslovníka.

V – PRAĆENJE PRIMJENE KODEKSA

Član 14.

- (1) Vijećnici će se uzajamno podsjećati i pozivati na obavezu poštivanja principa ponašanja utvrđenih ovim Kodeksom.
- (2) Predsjedavajući Vijeća će sa najvećom pažnjom pratiti ostvarivanje principa utvrđenih ovim Kodeksom i biće ovlašćen da u svakom momentu upozori na obavezu ponašanja u skladu sa Kodeksom, kao i da preduzme druge mjere u skladu sa Poslovníkom o radu Vijeća i ovim Kodeksom.
- (3) Vijećnici će svojim aktivnostima podsticati održavanje otvorenih diskusija uz aktivno učešće građana na kojima bi iznosili svoja viđenja, pa i o poštovanju ovog Kodeksa ponašanja.

Član 15.

- (1) U slučaju ustanovljenja povrede neke od odredbi ovog Kodeksa, vijećnik će biti podvrgnut kažnjavanju, a po postupku utvrđenog ovim Kodeksom.
- (2) Svrha ovog kažnjavanja je javna osuda neprihvatljivog ponašanja suprotnog ovom Kodeksu kao i moralni uticaj na buduće ponašanje vijećnika.
- (3) Kazne za povredu neke od odredbi ovog Kodeksa su:
 - ukor,
 - javni ukor sa objavljivanjem izvještaja i odluke,
 - novčana kazna.
- (4) Uz kaznu ukora i kaznu javnog ukora sa objavljivanjem izvještaja i odluke može se, kao sporedna kazna, izreći i novčana kazna, u skladu sa ovim Kodeksom.

Član 16.

- (1) Ako se izrekne kazna ukora, kao sporedna kazna može se izreći i novčana kazna u visini od 10% od mjesečne vijećničke naknade za period od dva mjeseca.
- (2) Ako se izrekne kazna javnog ukora sa objavljivanjem izvještaja i odluke, kao sporedna kazna može se izreći i novčana kazna u visini od 20% od mjesečne naknade za period od četiri mjeseca.
- (3) Novčana kazna, kao glavna kazna, izriče se u visini od 40% od mjesečne vijećničke naknade za period od tri do šest mjeseci. Ako je izrečena novčana kazna kao glavna kazna, smatra se da je izrečena, kao sporedna, i kazna javnog ukora sa objavljivanjem izvještaja i odluke.

Član 17.

- (1) U cilju obezbjeđenja primjene ovog Kodeksa, Vijeće imenuje Komisiju za primjenu Kodeksa ponašanja (u daljem tekstu: Komisija), koja u svom radu donosi poseban Poslovník.
- (2) Komisija prati primjenu Kodeksa, a naročito razmatra javno iznesene primjedbe i preporuke iznesene u bilo kom obliku, postupku po pojedinačnim prijedlozima za utvrđivanje postojanja povrede Kodeksa, podnosi izvještaje Vijeću sa preporukama i vrši druge poslove u vezi primjene ovog Kodeksa.
- (3) Komisija se sastoji od pet lica koje Odlukom imenuje Vijeće.

Član 18.

- (1) Svaki član javnosti je ovlašćen da podnese prijavu povrede Kodeksa, a u prijavi će obavezno navesti za koje radnje smatra da su povreda Kodeksa i kojim dokazima to potvrđuje.
- (2) Komisija razmatra prijavu i ovlašćena je da provede postupak ispitivanja osnovanosti prijave, da provede potpuni dokazni postupak i nakon toga odluči da li postoji povreda neke od odredbi ovog Kodeksa.
- (3) Ako Komisija zaključi da nije bilo povrede neke od odredbi ovog Kodeksa, o tome će obavijestiti podnosioca prijave, a Vijeće će o takvim slučajevima obavještavati najmanje šestomjesečno.
- (4) Ako Komisija zaključi da je određen vijećnik učinio povredu neke od odredbi ovog Kodeksa, Vijeću će podnijeti detaljan izvještaj sa preporukom o izricanju određene kazne.
- (5) Vijeće odlučuje o vrsti i visini kazne na osnovu preporuke Komisije, izuzev ako vijećnik priloži dodatne dokaze o nepostojanju povrede Kodeksa ili povrede postupka utvrđenog ovim Kodeksom.

Član 19.

- (1) Kazna ukora i javnog ukora sa objavljivanjem izvještaja i odluke, se izvršava saopštavanjem predsjedavajućeg Vijeća o izrečenoj kazni i dostavom primjerka odluke vijećniku prema kome je kazna izrečena.
- (2) Novčana kazna se izvršava dostavom odluke Vijeća nadležnoj službi za obračun vijećničkih naknada, koja će obezbijediti njeno izvršenje umanjnjem vijećničke naknade, u skladu sa tom odlukom.
- (3) Kazna ukora i javnog ukora sa objavljivanjem izvještaja i odluke i novčana kazna se objavljuju u "Službenom glasniku Općine Tešanj" i jednom od dnevnih listova.
- (4) O izrečenim kaznama za povredu ovog Kodeksa vodi se evidencija, a čije uredno i ispravno vođenje vodi sekretar Vijeća.

VI – OBJAVLJIVANJE

Član 20.

- (1) Svojim aktivnostima vjećnici će obezbijediti promociju ovog Kodeksa u javnosti i medijima.
- (2) Ovaj Kodeks će se objaviti u Biltenu Općine i kao posebna publikacija.

Član 21.

Ovaj Kodeks stupa na snagu osmog dana od dana objavljivanja u "Službenom glasniku Općine Tešanj".



OPĆINA TEŠANJ
OPĆINSKO VIJEĆE

STATUTARNO-PРАВNA KOMISIЈA

Predsjednik, Haris Agić

Haris Agić